


Hazrat Ibrāhīm

aur

Sārā



hazrat ibrahīm aur sārā
Hazrat Ibraheem and Sarah

(Urdu—Roman script)

© 2022 Chashma Media.
published and printed by
Good Word Communication Services Pvt. Ltd.
New Delhi, INDIA

Bible text is from UGV.
illus.: <https://sweetpublishing.com>, R. Gunther
(www.gunther.net.nz), J. P. Stanley
(<https://yoplace.com>)

for enquiries or to request more copies:
askandanswer786@gmail.com

Hazrat Ādam aur Hawwā kī nā-farmānī ke bāis un kā Ḳhudā ke sāth rishtā ṭuṭ gayā. Is ke bāwujūd Allāh ne unheñ nahīn chhoṛ diyā. Us kī marzī thī ki insān kā us ke sāth ḳhās rishtā bahāl ho jāe. Yahī wajah thī ki us ne Hazrat Nūh aur us ke ḳhāndān ko kashtī ke zariye sailāb se bachāyā.

Bahut-sāre baras guzar gae. Nūh ke beṭoñ Sim, Hām aur Yāfat ke bachche paidā hue, aur un kī aulād jald hī pūrī duniyā meñ phail gai. Tāham log pahle kī tarah hī Ḳhudā se nā-farmān rahe aur us kī rifāqat se dūr rahne lage. Phir bhī Allāh kī marzī thī ki un se rifāqat rakhe. Sadiyon ke bād us ne ek ādmī banām Ibrāhīm ko chun liyā tāki wuh aur us kī aulād us kī barguzidā qaum hoñ. Āie, ham wuh kuchh parheñ jo Tauret Sharīf meñ Hazrat Ibrāhīm ke bāre meñ likhā hai:

Yih Sim kā nasabnāmā hai: [...] Tārah 70 sāl kā thā jab us ke beṭe Abrām, Nahūr aur Hārān paidā hue. Yih Tārah kā nasabnāmā hai: Abrām, Nahūr aur Hārān Tārah ke beṭe the. Lūt Hārān kā beṭā thā. Apne bāp Tārah kī zindagī meñ hī Hārān Kasdiyon ke Ūr meñ intaqāl kar gayā jahāñ wuh paidā bhī huā thā.

Bāqī donoñ beṭoñ kī shādī huī. Abrām kī bīwī kā nām Sāray thā aur Nahūr kī bīwī kā nām Milkāh.

Milkāh Hārān kī beṭī thī, aur us kī ek bahn banām Iskā thī. Sāray bānjh thī, is lie us ke bachche nahīn the.



Tārah Kasdiyōn ke Ūr se rawānā hokar Mulk-e-Kanān kī taraf safr karne lagā. Us ke sāth us kā beṭā Abrām, us kā potā Lūt yānī Hārān kā beṭā aur us kī bahū Sāray the. Jab wuh Hārān pahūnche to wahān ābād ho gae.

Abrām kī Bulāhaṭ

Rab ne Abrām se kahā, “Apne watan, apne rishtedāron aur apne bāp ke ghar ko chhoṛkar us mulk meñ chalā jā jo main tujhe dikhāūngā.



Main tujh se ek baṛī qaum banāūngā, tujhe barkat dūngā aur tere nām ko bahut baṛhāūngā. Tū dūsron ke lie barkat kā bāis hogā. Jo tujhe barkat deṅge unheñ main bhī

barkat dūngā. Jo tujh par lānat karegā us par main bhī lānat karūngā. Duniyā kī tamām qaumeñ tujh se barkat pāēngī.”

Abrām ne Rab kī sunī aur Hārān se rawānā huā.





Lūt us ke sāth thā. Us waqt Abrām 75 sāl kā thā. Us ke sāth us kī bīwī Sāray aur us kā bhatijā Lūt the. Wuh apne naukar-chākaron samet apnī

pūrī milkiyat bhī sāth le gayā jo us ne Hārān meñ hāsīl kī thī. Chalte chalte wuh Kanān pahūnche.

Abrām us mulk meñ se guzarkar Sikam ke maqām par ṭhahr gayā jahān Morih ke balūt kā daraḥt thā. Us zamāne meñ mulk meñ Kanānī qaumeñ ābād thīn. Wahān Rab Abrām par zāhir huā aur us se kahā, “Maiñ terī aulād ko yih mulk dūngā.” Is lie us ne wahān Rab kī tazīm meñ qurbāngāh banāi jahān wuh us par zāhir huā thā.

Wahān se wuh us pahārī ilāqe kī taraf gayā jo Baitel ke mashriq meñ hai. Wahān us ne apnā ḡhaimā lagāyā. Maḡhrib meñ Baitel thā aur mashriq meñ Aī. Is jagah par bhī us ne Rab kī tazīm meñ qurbāngāh banāi aur Rab kā nām lekar ibādat kī.

Phir Abrām dubārā rawānā hokar junūb ke Dasht-e-Najab kī taraf chal parā.

Rab kā Abrām ke sāth Dubārā Wādā

Rab ne Abrām se kahā, “Apnī nazar uṭhākar chāron̄ taraf yānī shimāl, junūb, mashriq aur maḡhrib kī taraf dekh. Jo bhī zamīn tujhe nazar āe use main̄ tujhe aur terī aulād ko hameshā ke lie detā hūn. Main̄ terī aulād ko ḡhāk kī tarah beshumār hone dūngā. Jis tarah ḡhāk ke zarre gine nahīn jā sakte usī tarah terī aulād bhī ginī nahīn jā sakegī. Chunānche uṭhkar is mulk kī har jagah chal-phir, kyon̄ki main̄ ise tujhe detā hūn.”

Abrām rawānā huā.

Chalte chalte us ne apne ḡere Habrūn ke qarīb Mamre ke daraḡhton̄ ke pās lagāe. Wahān̄ us ne Rab kī tāzīm meñ qurbāngāh banāi.



Abrām ke Sāth Rab kā Ahd


Is ke bād Rab royā meñ Abrām se hamkalām huā, “Abrām, mat ḡar. Main̄ hī terī sipar hūn, main̄ hī terā bahut baḡā ajr hūn.”



Lekin Abrām ne etarāz kiyā, “Ai Rab Qādir-e-mutlaq, tū mujhe kyā degā jabki abhī tak mere hān koī bachchā nahīn hai aur Iliyazar Damishqī merī mīrās pāegā. Tū ne mujhe aulād nahīn baḡhshī, is lie mere gharāne kā naukar merā wāris hogā.”

Tab Abrām ko Allāh se ek aur kalām milā. “Yih ādmī Iliyazar terā wāris nahīn hogā balki terā apnā hī beṭā terā wāris hogā.”

Rab ne use bāhar le jākar kahā, “Āsmān kī taraf dekh aur sitāroñ ko ginane kī koshish kar. Terī aulād itnī hī beshumār hogī.”



**Abrām ne Rab par bharosā rakhā.
Is binā par Allāh ne use rāstbāz
qarār diyā.**

Jab Abrām 99 sāl kā thā to Rab us par zāhir huā. Us ne kahā, “Maiñ Allāh Qādir-e-mutlaq hūñ. Mere huzūr chaltā rah aur be-ilzām ho. Maiñ tere sāth apnā ahd bāndhūngā aur terī aulād ko bahut hī zyādā baḥhā dūngā.”

Abrām muñh ke bal gir gayā, aur Allāh ne us se kahā, “Merā tere sāth ahd hai ki tū bahut qaumoñ kā bāp hogā. Ab se tū Abrām yāñī ‘Azīm



Bāp’ nahīñ kahlāegā balki terā nām Ibrāhīm yāñī ‘Bahut Qaumoñ kā Bāp’ hogā. Kyoñki maiñ ne tujhe bahut qaumoñ kā bāp banā diyā hai. Maiñ tujhe bahut hī zyādā aulād baḥsh dūngā, itnī ki qaumeñ baneñgī. Tujh se bādshāh bhī nikleñge. Maiñ apnā ahd tere aur terī aulād ke sāth nasl dar nasl qāym karūngā, ek abadī ahd jis ke mutābiq maiñ terā aur terī aulād kā Ḳhudā hūngā.

Allāh ne Ibrāhīm se yih bhī kahā, “Apñī bīwī Sāray kā nām bhī badal denā. Ab se us kā nām Sāray nahīñ balki Sārā yāñī shahzādī hogā. Maiñ use barkat baḥshūngā aur tujhe us kī mārīfat beṭā

dūngā. Main use yahān tak barkat dūngā ki us se qaumeñ balki qaumoñ ke bādshāh nikleñge.”

Ibrāhīm muñh ke bal gir gayā. Lekin dil-hī-dil meñ wuh hañs paṛā aur sochā, “Yih kis tarah ho saktā hai? Main to 100 sāl kā hūñ. Aise ādmī ke hān bachchā kis tarah paidā ho saktā hai? Aur Sārā jaisī umr-rasīdā aurat ke bachchā kis tarah paidā ho saktā hai? Us kī umr to 90 sāl hai.”



Allāh ne kahā,
“Terī bīwī Sārā ke
hān beṭā paidā hogā.
Tū us kā nām Is’hāq
yānī ‘Wuh Hañstā
Hai’ rakhnā. Main
us ke aur us kī aulād
ke sāth abadī ahd
bāndhūngā. Merā

ahd Is’hāq ke sāth hogā, jo ain ek sāl ke bād Sārā ke hān paidā hogā.”

Rab Mamre meñ Ibrāhīm par Zāhir Huā


Ek din Rab Mamre ke daraḳhton ke pās Ibrāhīm par zāhir huā. Ibrāhīm apne ḳhaime ke darwāze par thā. Din kī garmī urūj par thī.



Ibrāhīm ne kahā, “Mere āqā, agar mujh par āpke karm kī nazar hai to āge na barheñ balki kuchh der apne bande ke ghar ṭhahreñ.”

Rab ne kahā, “Ain ek sāl ke bād main wāpas āūngā to terī bīwī Sārā ke beṭā hogā.”

Sārā yih bāteñ sun rahī thī, kyonki wuh us ke pīchhe ḵhaimē ke darwāze ke pās thī. Donoñ miyāñ-bīwī būrhe ho chuke the aur Sārā us umr se guzar chukī thī jis




meñ auratoñ ke bachche paidā hote haiñ. Is lie Sārā andar hī andar hañs paṛī aur sochā, “Yih kaise ho saktā hai? Kyā jab main būrḥāpe ke bāis ghise-phaṭe libās kī mānind hūñ to jawānī ke joban kā lutf uṭhāūñ? Aur merā shauhar bhī būrḥā hai.”

Rab ne Ibrāhīm se pūchhā, “Sārā kyon hañs rahī hai? Wuh kyon kah rahī hai, ‘Kyā wāqaī mere hañ bachchā paidā hogā jabki main itnī umr-rasīdā

hūn?’ Kyā Rab ke lie koī kām nāmumkin hai? Ek sāl ke bād muqarrarā waqt par main wāpas āūngā to Sārā ke beṭā hogā.”

Is’hāq kī Paidāish

Tab Rab ne Sārā ke sāth waisā hī kiyā jaisā us ne farmāyā thā. Jo wādā us ne Sārā ke bāre meñ kiyā thā use us ne pūrā kiyā. Wuh hāmilā huī aur beṭā paidā huā.



Ain us waqt būrhe Ibrāhīm ke hāñ beṭā paidā huā jo Allāh ne muqarrar karke use batāyā thā. Ibrāhīm ne apne is beṭe kā nām Is’hāq yānī ‘Wuh Hañstā

Hai’ rakhā.

Jab Is’hāq paidā huā us waqt Ibrāhīm 100 sāl kā thā. Sārā ne kahā, “Allāh ne mujhe hañsāyā, aur har koī jo mere bāre meñ yih sunegā hañsegā. Is se pahle kaun Ibrāhīm se yih kahne kī jurrat kar saktā thā ki Sārā apne bachchoñ ko dūdh pilāegī? Aur ab mere hāñ beṭā paidā huā hai, agarche Ibrāhīm būrhā ho gayā hai.”

Is'hāq barā hotā gayā. Jab us kā dūdh chhuṛāyā gayā to Ibrāhīm ne us ke lie barī ziyāfat kī.



Sawāl

- *Jo kuchh Allāh farmātā hai kyā ham us par bharosā rakh sakte haiñ?*

► Beshak. Wuh hameshā hī apne wāde par pūrā utartā hai. Ham us ke kalām par pūrā bharosā rakh sakte haiñ.

Yon ek zabūr farmātā hai,

Rab kā kalām sachchā hai, aur wuh har kām wafādārī se kartā hai.
(Zabūr 33:4)

Dāūd Bādshāh ko bhī yahī tajribā huā,

Rab ke farmān pāk haiñ, wuh bhattī meñ sāt bār sāf kī gaī chāndī kī mānind khālis haiñ. (Zabūr 12:6)

Aur Sulemān Bādshāh farmāte haiñ,

Wāqāī, Rab ne apnā wādā pūrā kiya hai. (1 Salātīn 8:20)

Injil Jalīl meñ Ḳhudā farmātā hai,

Āsmān-o-zamīn to jāte raheᅅge,
lekin merī bāteᅅn hameshā tak qāym
raheᅅgī. (Lūqā 21:33)

Yasāyāh Nabī bhī yahī kuchh farmātā hai,

Ghās to murjhā jāti aur phūl gir jātā
hai, lekin hamāre Ḳhudā kā kalām
abad tak qāym rahtā hai.
(Yasāyāh 40:8)

Ḳhudā apne wādoᅅn par pūrā utarā. Jo wādā
us ne Ibrāhīm se kiyā thā use us ne pūrā
kiyā. Hazrat Ibrāhīm āᅅhir meᅅn us mulk
meᅅn pahuᅅnch gae jis kā wādā Ḳhudā ne kiyā
thā. Phir sau sāl kī umr meᅅn hī un kī bīwī
ke beᅅtā paidā huā, bilkul Allāh ke wāde ke
mutābiq. Āie ham bhī Allāh ke kalām par
bharosā rakheᅅn.

Lūqā 11:28 meᅅn likhā hai,

Haqīqat meñ wuh mubārak haiñ jo
Allāh kā kalām sunkar us par amal
karte haiñ.

Lekin Ḳhudā kā kalām kahāñ pāyā jātā hai?
Kitāb-e-muqaddas meñ jis meñ Tauret, Zabūr
aur Injil shāmīl haiñ.

Har pāk nawishtā Allāh ke rūh se
wujūd meñ āyā hai.
(2 Tīmuthiyus 3:16)



● *Kyā Ḳhudā ke lie koī kām nāmumkin hai?*

- Allāh ke lie koī bhī kām nāmumkin nahīn hotā.

Hazrat Ibrāhīm aur un kī bīwī Sārā ne apnī hī zindagī meñ dekhā ki Ḳhudā ke lie koī bhī kām nāmumkin nahīn hai. Allāh ne unheñ ek beṭā baḳhsh diyā, us umr meñ jab yih insān ke nazdīk nāmumkin hī hai (Paidāish 18:14).

Kalām-e-muḳaddas meñ kāī-ek kā zikr hai jin ko yih tajribā huā. Yoñ Aiyūb ne Ḳhudā se farmāyā,

Main ne jān liyā hai ki tū sab kuchh kar pātā hai, ki terā koī bhī mansūbā rokā nahīn jā saktā.

(Aiyūb 42:2)

Jab Yarmiyāh Nabī aise hālāt meñ phañse hue the jin se nikalnā nāmumkin hī thā to Ḳhudā ne farmāyā,

Dekh, main Rab aur tamām insānoñ kā Ḳhudā hūñ. To phir kyā koī kām hai jo mujh se nahīn ho saktā? (Yarmiyāh 32:27)

Jab Jibrāil farishte ne is kā elān kiyā ki Rūhul-quds ke wasīle se Mariyam ke beṭā paidā hogā to us ne kahā,

Allāh ke nazdik koī kām nāmumkin nahīn hai. (Lūqā 1:37)

Aur Hazrat Īsā ne bhī farmāyā,

Jo insān ke lie nāmumkin hai wuh Allāh ke lie mumkin hai. (Lūqā 18:27)



Āie ham is bāt se lipṭe raheñ ki Allāh ke lie koī bāt nāmumkin nahīñ hai. Ḳhudā kī zāt kabhī tabdīl nahīñ hotī. Ḳhudā āj bhī bazāhir nāmumkin kām kar saktā hai, bilkul usī tarah jis tarah purāne zamāne meñ.

- *Jab ham Hazrat Ibrāhīm kī tarah Ḳhudā par bharosā rakhte haiñ to is kā kyā natījā nikaltā hai?*

► Jab ham Hazrat Ibrāhīm kī tarah Ḳhudā kī sunkar us par bharosā rakhte haiñ to wuh hameñ apnī barkatoñ se nawāztā hai.

Ibrāhīm kā Allāh par pūrā etamād thā, aur wuh us ke hukmoñ par pūre utare. Isī etamād ke taht wuh apne mulk se nikalkar ek mulk kī taraf baḥne lage jo wuh nahīñ jānte the. Hāñ, us waqt wuh yih bhī nahīñ jānte the ki yih wādā kiyā gayā mulk kahāñ hai. Ḳhudā qadam baqadam un kī rāhnumāi karke us mulk meñ le gayā jis kā wādā us ne kiyā thā.

Allāh ne Ibrāhīm se wādā kiyā ki terī aulād sitāron jaisī beshumār hogī. Go aisā bilkul nahīn lag rahā thā to bhī Hazrat Ibrāhīm kī ummīd jāti na rahī balki wuh is wāde se lipṭe rahe. Go miyān-bīwī bahut būrhe the to bhī Hazrat Ibrāhīm kā pakkā īmān thā ki Sārā ke beṭā paidā hogā.

Isī bharose aur īmān ke bāis Ḳhudā ne Hazrat Ibrāhīm ko barkat dī. Isī binā par Allāh ne unheñ rāstbāz qarār diyā. Hāñ, isī wajah se Ḳhudā kā Ibrāhīm ke sāth rishtā mazbūt rahā (Paidāish 15:6).

Injil Jalīl is kī tasdīq kartī hai,

Ibrāhīm ne Allāh par bharosā rakhā. Is binā par Allāh ne use rāstbāz qarār diyā. Isī wajah se wuh “Allāh kā Dost” kahlāyā.

(Yāqūb 2:23 aur Romiyon 4:3-5)

Un ko shak na āyā balki unheñ Allāh ke wāde par pūrā bharosā thā. Balki chalte chalte un kā īmān mazīd mazbūt hotā gayā. Wuh Ḳhudā ko jalāl dete rahe yih īmān rakhte hue ki wuh apne wāde pūrā karegā.

Is lie Injil Jalīl meñ farmāyā gayā hai ki Hazrat Ibrāhīm hamāre lie namūne kā bāis haiñ.

Ibrāhīm kī misāl leñ. Us ne Allāh par bharosā kiyā aur is binā par Allāh ne use rāstbāz qarār diyā. To phir āpko jān lenā chāhie ki Ibrāhīm kī haqīqī aulād wuh log haiñ jo īmān rakhte haiñ.

(Galatiyoñ 3:6-7)

Matlab hai ki jab ham Allāh aur us ke pāk kalām par īmān rakhte haiñ to wuh hamko barkatoñ se nawāztā hai. Jis tarah likhā hai,

Chunāñche apne is etamād ko hāth se jāne na deñ kyōñki is kā baṛā ajr milegā. (Ibrāniyoñ 10:35)

Agar ham bewafā nikleñ to bhī wuh wafādār rahegā. Kyoñki wuh apnā inkār nahīñ kar saktā.

(2 Tīmuthiyus 2:13)

Āie ham us par bharosā rakheñ jo ẖudā apne pāk kalām meñ hameñ batātā hai. Kyoñki wuh chāhtā hai ki ham us par etamād kareñ. Tab ham bhī Hazrat Ibrāhīm kī tarah us ke dost thahreñge, aur wuh hameñ rāstbāz qarār degā.

Mazīd mālūmāt ke lie paṛhie Tauret Sharīf Paidāish 11:27 tā 25:11.

